



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tiryimym@aolima



tir yimym

TAPAK 7

## Monte Carlo Masters: Nagal-i qualifiers nung Flavio kokogo

## Mexico-i Ecuador den diplomatic tesendaktep mauytsü telemtetba agi

VOL. XXI ISSUE NO. 174 (ADOK 174) DIMAPUR AMUNGNÜ (SUNDAY) RONGCHII (APRIL) 07, 2024 ₹ 5.00

## Nagaland nung BJP 44 buba Foundation Day among

Dimapur, April 6, 2024 (TYO): BJP tenzüker 44 buba Foundation Day nung Nagaland State BJP President Benjamin Yephthomi-i Zunheboto Mandal nung party wako salaogo.

"Bharatiya Janata Party tera ya 1951 küm Bharatiya Jana Sangh tentetba nung amendaka lir. Dr. Syama Prasad Mookerjee aser Pt. Deendayal Upadhyaya nungeri anir lennirtemi linük, democracy aser temeten atema party tentetba asoshi tetushi agütsür" ta Benjamin Yephthomi-i karyakartas den jembidang ashi.

April 6, 1980 anogo party tentetba founding President Atal Bihari Vajpayee-i kümsük asem tashi Prime Minister inyakdang linük atema bendanga agüja inyakogo. BJP ya party tila ka tenzüka tanübo alima nung political party tulutiba kümogo aser iba atema tenüngsang agütsür, ta pai ashi.

BJP putiotsü ajanga asenok ajungmesotsüla aser party nükjidadong atema bendanga agütsüshir inyaktsüla. Tesüiba lennirtem aser züngsemtemi party tajungba kümdakja aruba atema tenüngsang agütsür, ta Benjamin-isa ashi.

"Prime Minister Narendra Modi lenisüba kübok tesüiba küm 10 tsüngda BJP-i jenjang tajung ajanzükogo. NDA sorkar ajanga ajak asoshi terenlok, temelenshi

tajungtem aser sorkar ketdangsubaren akangakanga aruba ajanga India nüjiso anguba sülen Golden Age bentsür aruogo" ta paisa ashi.

Nagaland nung April 19, 2024 nü 18 buba Lok Sabha election atema renemdang karyakartas ajaki Narendra Modi lenisüba kübok sorkar akümtsüsa takok angutsü merangtsüla. Nagaland nungi PDA consensus candidate nem takok ngudaktsütsü atema nisung ajaki central leaders tashi itdakttsütsüla, ta Benjamin-isa ayongzük.

'Ab Ki Baar, Char Sau Paar' yimym kübok Lok Sabha nung menden 400 atentsü atema asenoki inyaktsüla ta paisa ashi.

BJP Leader aser Deputy CM Yanthungo Patton lenisüba kübok BJP MLA temi anir asenoki tayongzükbatem koktettsü aser alizüngtem atongtsü ta Benjamin-isa metetdakttsü.

Honibarnü State Office Bearers-i district balala nung BJP wako salatsü aser State President indang onük lemsatepa liasü. Sentongtem nung district kübok mandal ajaki shilem agia liasü.

Nagaland State BJP President Benjamin-i tesem balala sema senzür aser pai tanü 32 Atoizu Mandal o 33 Suruhuto Mandal semdangogo aser maneni asüng 34 Aghunato Mandal semdangtsü.

## Rs 2 crore den hon auyaba SBI ketdangtsür apu

Imphal, April 6, 2024 (Agencies): Manipur nung State Bank of India ketdangtsür kati Rs 2 crore aser hon senti osettem bener jena aoba Delhi nung puogo.

Iba nisung ya Laishram Monarch Grace (41) lir aser pa ya SBI Bishnupur district branch nung senior assistant manager inyaka liasü. Pa aputsü bushitepa aruba sülen Delhi police indang

crime branch-i pa apu.

Hokolbar nikongdang 5:30 ako meta Maoris Nagar Police station anasa pa apu aser pai auyaba sen aser hon bushitepdar.

Manipur nung SBI bank branch manager-i April 3, 2024 nü Laishram Monarch Grace samaba osang sangoktsü aser iba sülen Manipur police-i pa bushitsü tenzüka liasü.

## All Manipur Christian Organisation-i election tiptema agitsü mepishir

Imphal, April 6, 2024 (Agencies): Manipur nung April 19 aser 26 nung Lok Sabha elections agitsü atema renemdang All Manipur Christian Organisation-i election maparen shitak aser timi agitsü ayongzükogo.

"Manipur nung tang kin o kin mangatettep aliba mapang aser ozüng alema inyakshitsü, vote alizüktsü aser tanga tim masüba maparen inyaktsü akok ta bilemba mapang iba election ya tajungtiba agitsü merangdi" ta

AMCO-i ashi.

AMCO-isa election ketdangtsürtem, political party tem, civil society teloktem aser vote enoktsür ajak dang election tiptema aser ochishia agitsü atema longjemtsü ayongzükogo.

Manipur nung tang mapang tamajung ka ajurua ir anungji Locke aser Rousseau ama political philosophers shisatsü aser Khristan tamangba tesayubatem nung ajemdaker Lok Sabha elections len anidaktsünür, ta AMCO-isa metetdakttsü.

## NLA züngsem 60 prongla BJP-i alena lir: S. Supongmeren Jamir



April 6, 2024 nü Mokokchung Town Hall nung Lok Sabha election atema Congress candidate S. Süpongmeren Jamir Candidature Declaration cum Campaign Kick-off Program agidang tangokba noksa ka angur.

Mokokchung, 6th April (TYO): Tang Nagaland nung aliba PDA sarkar ya opposition-less government lir, aji saka, tatar 60 ya azüklen alirtemi amshir. BJP ya national party ka aser yimya agi national party ji azüklen (high command)-i kechi shidir yangji anidakar, ta 18th Lok Sabha Election nung Nagaland nungi Congress ticket nung tokteptsü alisang, S. Süpongmeren Jamir-i metetdakttsü.

Pai iba o ya pa election-i aitsü asoshi candidature sangdongba den nübu ayim tenzüka sentong ka yangi Mokokchung town hall nung akadang metetdakttsü. Iba sentong ya Mokokchung District Congress Committee (DCC)-i ayongzük. Iba sentong nung ACCC balala nungi Congress meimer aika adenshi liasü.

Nagaland Legislative Assembly (NLA) nung züngsem ka/ozüng yanglur ka asütsü asoshi pei constituency nungi tatar par 60 shimer yoka lir. Parnok ya pei constituency nübur meyonger kaka lir. Anungji, parnoki nübur temeten kümzüka aser pei tamangba yimsü den sobaliba aser yimsüyimbong wazüka ayutsü asoshi inyaktsüla aser aji par mapa lir. Saka par 60-i yamaji meinyaker, ta pai kuli kar bener arua lemsatep. Anungji, shir bangdak mapang asen tamangba yimsü aser Naga nunger sobaliba samadakttsüsa meranger, aji par khuret asütsü,

ta paisa shisem.

BJP-i aniba sarkar ajanga Khristanpur lenmang balala nung anemba kuli aika lir, joko parnoki Khristanpur ali nung remdi asür. RSS maparen Nagaland nunga tenzüko. Anungji, tang ya tamang anokshiba mapang ka lir, yamaji BJP-i par sentong balala ajanga Khristanpur anema inyakaka asenoki ola madokteter, ta paisa sasasetta ashi.

Deobarnü vote azüngba anema asen kidanger Mizoram nungeribo ola adoka anogo melenshidakttsü saka Nagaland nungbo Deobarnü vote azüng saka PDA sorkari ola madokteter aser arogoi ola madok, ta paisa kuli kar shisem.

"Ao kini mezüng Naga lima Khristan yimsü bener aru süra, tang aruya aliba 19th April, 2024 nüji jungkai adoktsü. Tanba election yabo party politics masü saka temeshi rara ka lir. Anungji, Khristanpur saaktsüla aser arogoia ibai süoki ia agitsüla", ta Supongmeren-i ashi.

Relief jang angati aruba ya Modi-i yokba ama asenoki pelasetta agizüka chiyunger. Saka Modi sarkari item sen ya nübur dak nungi saru balala ajanga mesüker agütsür, ta paisa ashi.

BJP-i aniba NDA sorkar mezüng arudang par nükjidadong balala ataloka arudar. Ram temple yanglutsü ta asüba yangluogo, CAA tatar hoho nung benoktsü aliba benokogo, joko UCC dang anünga lir, anungji, BJP-i aniba

NDA sorkar tasemben arura, UCC jia benoktsü kecha menua maka, ta paisa shisem.

"Tanü India lima Khristanpur tamang jenjang anokshiba mapang ka lir, saka iba dak sentakba nung arogoi tokong songteta tejakleni marur. Ya tebilemtsü ulura, anungji, asenoki amangba tamang yimsü dak kongshiba party anema asenoki noktakttsüla", ta paisa ayongzük.

Paisa INDIA bloc-i aniba sarkar arura teinyaktsü kar lemsatepdang, tetsürtem jenjang ajungkettsütsü, lanutem mapa inyaktsü asoshi lenmang balala lapoktsütsü aser koda masür nüburtem atema sentong balala tenzükttsü, ta ashi. Yamaji nüburtemi shimra, Nagaland nung old pension system den tanga teinyaktsü wadang aliba balala lemsatep.

Tawa Delhi yimtiba nung NDA aser Modi sarkar anema rally ka ayongzük aser iba sentong nung nisung sentepbaji otsütsütsü ka liasü. India nunger otsü nung iba ama nisung sentepba mali. Anungji, nisung sendenbaji ngur taruba sarkarji INDIA Block sarkar arutsü teimla ka sayuba nüburtemi tetzür, ta paisa ashi.

Tanü iba sentong nung Nagaland Pradesh Congress Committee aser District Congress Committee ketdangtsürtemi shilem balala agia liasü.

## Dimapur nung New Market Jame Masjid Committee anentsüogo

Dimapur, April 6, 2024 (Agencies): North East nung drugs shibelener tetsüti Bahar Uddin apuba sülen Dimapur nung Muslim nunger tainten, GBs aser Muslim Jammatt senden ka nung New Market Jame Masjid Committee anentsüogo.

Hokolbarnü senden amendang Bahar Uddin tir ser tentetba Jame Masjid Committee aser Advisory Board anentsütsü

lemtet.

Iba senden ya New Market Jame Masjid nung amen aser idangji züngsem 7 agi akümba ad hoc committee ka tentet aser parnoki ita trok atema New Market Jame Masjid ketdangtsüa atatsü tashi agütsüogo. Ad hoc committee chairman inyaktsü atema Shanawar Shaikh (Munna) shim.

Senden nung adenertemisa

April 6, 2024 nungi tenzüker ita trok tsüngda New Market Jame Masjid Committee ka tentettsü mapang atakzüktsüogo.

DGP Rupin Sharma lenisüba kübok Nagaland police-i Bahar Uddin apuba atema senden nung adenertem tenüngsang agütsü. Parnokisa Bahar Uddin-i inyakba mapa aitsüogo aser ozüng tapet agi merenshitsü imlaba metetdakttsüogo.



### Dimapur DC-i ayongzüka ARO & Nodal office tem senden menogo



April 6 nü DC aser District Election Officer, Dimapur Dr. Tinojongshi Chang NCS-i ayongzüka ARO aser Nodal officer tem senden amenba mapang tangokba noksa nung angur.

**Dimapur, Rongchii/April 6 (TYO):** Taruba 18buba Lok Sabha Elections kecha tetsükdaksü makai agitsü atema Deputy Commissioner and District Election Officer Dimapur Dr. Tinojongshi Chang, NCS-i ayongzüka ARO aser nodal officer tem den April 6 nü senden ka menogo.

Iba senden nung DC-i, district nung taruba election atema renemshia aliba indang metetdaksü. Chang-isa, election inyakyim dak sendaka aliba administrative body tem aser stakeholder tem tsüingda tesendaktep tajungba kümdaktsü nükjidong nung iba senden ayongzüka ta ashi.

Paisa, election takok ngua agitsü atema sentongtem koda kanga kümdanga junga yanglutsü aser sendaktepa inyaksü nüngdaker iba indang lemsatepa liasü.

Senden nung election management, security anepaluba, voter awareness campaign aser logistics dak sendakba nung onük balala

benoka tatongi sensaksemogo. Nodal officer aser ARO tem nem election dak sendakba nung maparen ajak takok ngua inyaksü atema parnok shilem aser khurtem metetdakja liasü.

Senden nungsa Assistant Election Officer Toshimongba Longchar-i, Essential services personnel aser AVSC aser AVPD-i facilitate asürtem postal ballots ajanga April 8 nungi 10 tashi Deputy Commissioner indang Office nung vote agütsütsü ta metetdaksü. Iba den bendenloksema AVPD tem atema kasa mapang tsüingda parnok kidangi oa vote agütsüdaktsütsü.

Longchar-isa, Electronic Voting Machines (EVMs) ya April 8 aser 9 nü anepdang 9 ako nungi tenzüka DC office nung commission asütsü ta metetdaksü. Paisa, election inyakyim takok ngua achaayangtsü atema Control Room inyaksangshi tenzüka indang metetdaksü.

Maneni Longcha-i,

Dimapur, Nuiland, aser Chümoukedima atema training tasembuba shilem April 15 nü agitsü ta metetdaksü. Terenemshiba nung shilem ka ama Model Polling Stations aser tetsür polling officer temi achaayangba polling stations tem amenoktsü. Iba den bendenloksema, voter tem nem teyari agütsütsü atema Voters Facilitation Centre amenoktsü, ta paisa metetdaksü.

Kasa mapang nung webcasting training April 8 nü agitsü atema renema lir aser vote agütsüba anogo matong tsüingda mepetmesü adoktsü alibatem jangja atatsü aser item ya benteter atatsü atema April 9 nü mock drill/dry run ka agitsü asoshi sentong yanglur lir, ta pai metetdaksü.

Dimapur-I, Dimapur-II, aser Dimapur- III Assembly Constituency nungi Assistant Returning Officers (AROs) ajak aser inyakyim balala atema nodal officer temi iba senden nung shilem agia liasü.

### Kiphire nung tzüinglurowa atema renemshiba senden amen



**Dimapur, Rongchii/April 6 (TYO):** April 5 nü DC conference hall nung senden ka ayongzüka amenba mapang District Disaster Management Authority, Kiphire-i tzüinglurowa atema renemshia atatsü asoshi onük balala benoka sensaksemogo. Iba senden ya DC & Chairman DDMA Kiphire Tamsuwati Longkumer lenisüba nung mena liasü.

Senden nung National highway, R & B dang, yimtsüingtemi aoba lenmangtem densema jila nung lenmangtem tzüinglurowa maru tsüingda

nüburtem teküzmükba kübok toktsütsü aser taruba election mapang senzüsenpong nung kecha tetsükdaksü madoktsü atema merektettsü tetuyuba agütsüogo.

Kasa mapang nung tanga stakeholder department tem dang renema alitsü shiogo. Petrol pump kiburtem dang jongdak maparen balala atema totzü rizünga yua atatsü aser Kiphire Town Chamber of Commerce and Industry (KTCCI) dang chiyongtsü agi manüngtsüsa jenjang tapet agitsü tetuyuba agütsüogo.

Maneni Fire and Emergencies, Medical, IR battalion densema tanga stakeholder aser department tem dang pi tata mapa renema atatsü tetuyuba agütsüogo.

Senden nung sensaksemba mapang züingsemtemi, nüburtem küzmükba toktsütsü aser anentsüh aluba nokdangtsü atema jila nung tzi atsinga aliba tesem aser jana ajanga nokdanga aliba kilentzüttem merektettsü asoshi lokti nübtoka merektettsü sentong ka ayongzüka agitsü telemteba agia liasü.

### Peren aser Tuensang nung Polling Personnel Randomization sentong agiogo

**Dimapur, Rongchii/April 6 (TYO):** Peren District atema Polling Personnel tem Randomization tanabuba shilem April 6 nü ADC, Peren office nung agiogo.

Inyakyim ajak ya Expenditure Observer, Vivek Chauhan (IRS), District Election Officer, Assistant Returning Officers aser tanga ketdangsürtem

matsüingdang agia liasü. Kasa mapang nung April 6 nü Tuensang District atema Polling Personnel tem Randomisation sentong agiogo.

Iba sentong ya Deputy Commissioner & District Election Officer, Tuensang A. Zibenthung Kithan-i achaayanga NIC Conference Hall Tuensang nung agia liasü.

### Wokha nung essay & slogan tetoktepba agi



**Dimapur, Rongchii/April 6 (TYO):** Wokha district kübok SVEEP (Systematic Voter's Education and Electoral Participation) inyakyim nung shilem ka ama aser taruba Lok Sabha election dak dak sendakba nung Libemo Memorial School, Wokha nung April 5 nü essay aser slogan zülutepba tetoktepba ka ayongzüka agiogo.

Iba tetoktepba ya High School level aser Higher Secondary School level ta jenjang ana küma lemsar agia liasü, kong essay aser slogan zülutepba tetoktepba nung kaketshir 35 shi-i shilem agiogo.

Sentong nung o jembiba mapang SDO (C), aser Nodal Officer (SVEEP) Wokha, Nuhuta Tunyi-i, SVEEP

inyakyim ya voter tem nem tangazükba agütsütsü aser voters literacy ajungkettsü nükjidong nung ayongzüka agir, ta ashi.

SVEEP ya multi-intervention sentong ka lir, koba lenla balala ajanga nüburtem, elector aser voter tem nem electoral inyakyim indang tangazükba agüja parnok tangatetba kümdaktsütsü aser election mapang tangazükba shidak bener telemteba shitak agia shilem agidaktsütsü asoshi lir, ta pai ashi.

Maneni pai, Wokha jila kübok school ajak anisemer iba amala inyakyim ya yakta benoka inyaksü, ta ashiba den iba tetoktepba nung shilem tajung agiba atema kaketshirtem dang kanga pelaba lemsatepa liasü.

### DC & DEO Phek-i postal ballot indang metetdaksü

**Dimapur, Rongchii/April 6 (TYO):** DC & DEO Phek John Tsulise Sangtam, NCS-i, Phek district kübok Polling Personnel, Electors Category aser Absentee Voters, PLOs, Sector Officers aser Political Party ajak dang Postal Ballot (House to house) ajanga vote agütsüba inyakyim April 11 nü agitsü ta

metetdaksüogo. Maneni Postal Ballot atema Nodal Officer-i training/briefing ya April 10 nü 4:00 ako nungi tenzüka Postal Ballot Cell, DC & DEO office, Phek nung agütsütsü aser iba atema Postal Ballot Team, Polling Personnel ajak dang tamakok maludaktsüi mapang shitak nung arutsü metetdaksüogo.

### Longleng nung Medical Board senden menogo

**Dimapur, Rongchii/April 6 (TYO):** Medical ground dak ajemdaker election mapa nungi taitok meshiba polling personnel tem indang application tem jangjashitsü atema Longleng Medical Board senden ka April 6 nü DC conference hall

Longleng nung menogo. Medical board nung Additional Deputy Commissioner, Alongdhimen Jamir, NCS; CMO Longleng, Dr. Tiasunep aser DTO, Dr. Temsusashi nunger densema lir.

### Pughoboto nung webcasting/offline videography atema training agi

**Dimapur, Rongchii/April 6 (TYO):** 18buba Lok Sabha Elections atema webcasting/offline videography dak sendakba nung ADC & DEO office, Pughoboto nung April 6 nü training ka agiogo. Iba training sentong nung shisalen sayurji Vihoto Sheqi aser Isak na liasü.

agia liasü, koba VDB Hall, Pughoboto nung agia liasü.

DEO-isa, polling station shilem 20 atema mezüngbuba Mock Drill April 9 nü agitsü aser polling stations shilem 50 atema tanabuba Mock Drill/Mega Mock Drill April 12 nü agitsü, ta metetdaksü.

Pughoboto Assembly Constituency kübok polling stations 17 atema webcasting asoshi shimba operator tem ajak iba training sentong nung shilem

Mock drill tem tembangba sülen Webcasting systems tem ya bendena DEO office nem meyipa agütsütsü, ta kasa sangdong ajanga metetdaksü.



# CPI-i Lok Sabha election atema party manifesto sayaogo



New Delhi, April 06, 2024: Honibarnü Communist Party of India (CPI) lenirtemi taruba Lok Sabha election atema party manifesto sayadang tangokba noksa nung angur.

**New Delhi, Rongchii/April 06 (Agencies):** Honibarnü Communist Party of India (CPI)-i taruba Lok Sabha election atema party manifesto sayaogo.

CPI-i Citizenship (Amendment) Act ozüing agientsü, SC, ST aser OBCs reservation shilem 50 tashi dang lezmükja aliba agientsü aser MGNREGA scheme kübok anogo ka aayangba sen 700 tashi kümtsütsü, ta manifesto nung nangzüka lir.

Left party-isa linük nung secular democracy kümzüka ayutsü atema BJP tamakok ngudakjang, ta tayongzüka agütsü.

Tesüiba küm ter BJP-i yimsüsüba ya linük atema kanga majung liasü ta kuli nguogo, ta parnoki metetdaksü.

"Election nung talok ngura CPI-i Citizenship (Amendment) Act ozüing agientsü, reservation shilem 50 tashi dang agütsütsü

lateta aliba ya agientsü, caste census agitsü aser Mahatma Gandhi National Rural Employment Guarantee Act (MGNREGA) kübok anogo ka aayangba taaji sen 700 tashi kümtsütsü," ta CPI-i metetdaksü.

"18buba Lok Sabha general election ya kanga tongtibang asütsü, talisa secular democratic republic, linük tarutsü tia aser asen linük temzüng kübok tangatetbatem atema kanga tongtibang asütsü," ta CPI manifesto nung shia lir.

Manifesto sayatsüba sülen osangbenertem den jembidang CPI general secretary, D Rajai, "Taruba general election ya linük aser tarutsü atema kanga tongtibang asütsü. (PM Narendra) Modi yimsüsüba ya linük atema kanga majung liasü. Linük temzüng anema inyaker. BJP-i RSS indang yimtenren army ka ama linük temzüng

melenshitsu meranger aser tatemtsabo melenshitsu," ta tai tongloksü.

Left party-isa, party-i election nung takok ngura linük nung kasa mezüingshiba tebilemtsü ya bentetsü atema inyaksü, ta metetdaksü.

CPI-isa, Enforcement Directorate (ED) aser Central Bureau of Investigation (CBI) ama central agency tem ya Parliament kübok aiddaksütsü aser Centre sorkari tiyongtsüi ia jangjonga inyakba nokdanga federal tashi itdaksütsü atema Governor's Office agientsü, ta metetdaksü.

"Tongtibang telemtetbatem agitsü atema state tem nung nüburtemi shimtetba sorkartem nem tashi agütsütsüla," ta manifesto nung shia lir.

"Onoki kodang sorkar tasen tentetdir ozü party-i nüburtem tebilemtsü onük balala atema inyaksü," ta Raja-isa metetdaksü.

# Chhattisgarh nung sepaitemi Maoists telungpur asem khaset

**New Delhi, April 06 (Agencies):** Honibarnü Telangana arrtsülen Chhattisgarh state kübok Bijapur district nung sepaitemi Maoists telungpur asem khasetogo.

State ana arrtsülen Bijapur district kübok Pujari Kanker arem nung Greyhounds sepaitem aser Telangana elite anti-Naxal sepaitem senteper telungpurtem

mita aoba mapang nung telungpur den rara aser telungpur asem khaset, ta police ketdangser kati metetdaksü.

Kasa tesem nungjisa Chhattisgarh police-a liasü aser parnokia Greyhounds team den yaritepa liasü, ta police ketdangserisa metetdaksü.

"Iba rara nung Maoists telungpur asem khaset aser

raraba tesem nungjagi raraba hadir aika nguogo," ta paisa metetdaksü.

Tang tashi sepaitemi telungpurtem mita odar.

Tan hopta tetenzüklena Chhattisgarh kübok Bijapur district nung police aser sepaitemi tetsür asem densema Maoists telungpur 13 khaseta liasü.



April 06, 2024 nü West Bengal kübok Birbhum district nung taruba Lok Sabha election atema polling ketdangsertem Electronic Voting Machines (EVM) aser Voter Verifiable Paper Audit Trail (VVPAT) machine amshiyim indang training agidang tangokba noksa nung angur.

# Laos nungi India nunger aayanger 17 kümzüka anir aruogo: S Jaishankar

**New Delhi, Rongchii/April 06 (Agencies):** Honibarnü India External Affairs Minister (EAM), S Jaishankar-i, Laos nungi India nunger aayanger 17 kümzüka anir arubaji "Modi ki Guarantee" ajanga lir, ta metetdaksü.

India nungertemji iba linük jagi mesüzüka anir aoba sülen ozüing alema mapa inyakkakja liasü, ta sorkar ketdangsertemi metetdaksü.

Jaishankar-isa Laos nung aliba Indian Embassy nung ketdangsertem aser Laos nung ketdangsertem dang pelaba lemsatop.

Jaishankar-i X ajanga, "Linük aser bendanglen naprongla nung 'Modi ki Guarantee' ajanga ajak asoshi mapa inyaker. Mesüzüka Laos nung ozüing alema mapa inyakkaksür India nunger 17 kümzüko aser tang kidangi anir arudar," ta metetdaksü.

Paisa, "Kanga junga inyakogo, @IndianEmbLaos. Sensotem kümzüka maparen nung yaritepba atema Laos nung ketdangsertem dang pelar," ta paisa metetdaksü.

Brihostibarnü External Affairs Ministry-i India nungertem dang Cambodia nung mapa tajung agütsütsü, ta yazü nangzüka nisung shibelenba nungi kümzüka alitsü atema kanga kümküma alitsüla, ta tekümdangtsü metetdakja liasü.

EAM-isa, "Mapa maongka atema Cambodia semdangtsü tebilemba alir India nungertemi kanga kümdangtsüla aser temelaba agüja alir agent tem ajanga dang inyaksüla. Cambodia nung mapa agütsürtem osangji jungjunga bushisüngdangba sülen ang inyaksangshitsü asoshi tekümdangtsü metetdaksür," ta sangdonga liasü.



April 06, 2024 nü New Delhi nung AAP lenir aser Minister Gopal Rai-i osangbenertem den jembidang tangokba noksa nung angur.

# Tanü Punjab nung AAP lenirtemi longkak aittsü

**New Delhi, April 06 (Agencies):** Delhi Chief Minister Arvind Kejriwal apuba anema Amongnü Punjab Chief Minister, Bhagwant Mann leniba nung AAP MLA tem aser party pusemertemi mener lumia longkak aittsü, ta Honibarnü party lenir kati metetdaksü.

Delhi chief minitser apuba anema April 7 nü linük tesem ajaklen lumia longkak aittsü atema Aam Aadmi Party (AAP)-i ayongzüka liasü.

Delhi excise policy nung taoba ita Enforcement Directorate-i AAP tongti lenir, Kejriwal pua liasü aser pa maneni April 15 tashi judicial ket nung ayutsü.

Honibarnü Amritsar nung osangbenertem den jembidang AAP MLA, Dinesh Chadha-i, democracy kümzüksü atema April 7 nü Punjab chief minister aser party MLA temi Shaheed Bhagat Singh Nagar district kübok Khatkar Kalan nung lumia longkak aittsü, ta metetdaksü.

Paisa, Punjab nung nüburtem nem-a lumia longkak aitba sentong nungji shilem

agidaksüner, ta mepishia metetdaksüogo.

Kejriwal apuba ya Centre nung BJP-i aniba sorkar ajanga lir aser BJP-i AAP den tongti lenir, Kejriwal ya parnok atema amokmeren tulutiba ama züingshir, ta paisa metetdaksü.

Enforcement Directorate-i Kejriwal ket nungi senjang kata mangu, ajisüaka pa pua jail nung puokogo, ta paisa metetdaksü.

Tang pa Tihar Jail nung puoka lir; jail nung pai mapang teimbaka sarasademba, kaket azüingba aser yoga aiba nung mapang indoker, ta osang ka ajanga metetdaksü.

Pa puoka aliba takdang nungji pa nem broadcasting news, entertainment aser saisapong tv channels agütsür, ajisüaka pai TV merepranger.

Anogo ishika tejaklen Kejriwal-i Ramayana, Mahabharata, Geeta aser 'How Prime Minister Decides' densema kaket ishika pa nem agüjang, ta mepishia liasü.

Tihar Jail nung anogo shia pa anepdang kera saaker, iba sülen jail takdang merükteter, ta kasa osang ajanga metetdaksü.





## TIR YIMYIM YIMOBILEM (EDITORIAL)

DIMAPUR AMUNGNÜ, APRIL (RONGCHII) 07, 2024

### Na ya tesangwa !

**L**aishibai ashir, asenok ajak ya tesangwa lir. Aji oda, tanü nü dang kari nü tenüing watsü mesüra wabong Tesangwa lir ta ashika asünunga naia koma bilemstsü. Ni jashia dang alir nung kodaser kü tenüing tesangwa asütsü ta nai bilemstsüa akok. Kü o aser mapa agi shinga mepeladaksütetter nung kodaser kü tenüing tesangwa asütsü ta nai rataa bilemstsüa akok. Ajisüaka, Mathi 5 : 1416 nung ashir, "Nü dak aliba tesangwaji nisungtemi angutsüsa yalokjang, idangji parnoki nai tajung inyakbaji angutsü aser kotak nung aliba tebu sentsüwangshidaksütsü." Tetezü asenok nisung shia dak tesangwa lir aser asen dak aliba tesangwa jagi amang ajak sangwadakja ayatsüla. Tesangwai inyaksüba mapaji amang sangwadaksütsü asoshi lir. Aji oda, Tsüngremi nü taküm nung iba sangwa jagi sünga lidaksüner. Iba tesangwa jagi nü dak Tsüngrem tashi alibaji tangar tsüngdang kuli südaktsüner. Iba jagi asen meketa aliba adianutem shirnok mulungjang nung tamang aser shisabolu agi sünga lir, parnok mulungjangji tesangwa agi melentsütsü. Ajisüaka, asenoki asen aliba lima ya temenen agi sünger tammangba- tammangba akümba angur. Iba ama mapang nung asenoki tammang aitsüba kija agibo tesangwa mangutsü. Alima manga akümbaji parnoka parnok shilem inyaker, anungji asenoka asenoki inyaksüba tongtibang mapabaji asenok dak aliba tesangwa tashiji tammang tashi dang nung jagi tuluba asütsüla. Kodang asen meketa tammang agi süngadokdir, tebilemstsüji amangji masü saka mesangwadaksütetbaji asütsü. Yisui asenok ajak ya alima sangwadaksürtem südaktsüner. Alima nung Tsüngrem temeim mangashidangba purtem million aika lir, item dangji asenok dak aliba tesangwaji bener oa Tsüngrem temeim metetdaksütsüla. Kodang, Yisu alimai aru, alima nung tammang jena oa adok. Alima tammangi pa tesangwaji metizüktet. Pa aolen ajaklen Tsüngrem temeimi alima meimchirtem kümzükbä osang tajung sangdong, meimchirtem temulung meyip, shirangertem aneptsü, temenen purtem nem taidok agütsü aser anemsüba mapatem jakdaka arütsü. Alima temenen tammang tia nung aliba mapang kodang Tsüngremi iba limaji sangwadaksütsü asoshi Pa chir Yisu Khrista alimai yok, iba jagi alima sangwadaksü. Ibayongji, asenok ano tanaben Tsüngrem chir aküm, anungji joko asenok tammang chirtem masü tesangwa chirtem lir ta Laishibaisa ashir. Tesangwa chirtem tetezü asenok dak tesangwa lir aser iba tesangwa jagi amang tia nung aliba taküm aser kibong sangwadakja inyaksüla. Asenok dak aliba tesangwaji tangari angutsüsa asenok taküm aser kibong alitsü tim. Nü dak aliba tesangwaji tsükloker oa tangar tsüngdang sayuang ta Laishibai mashir, saka tangar nem ngudakjang ta ashir. Tetezü asenoki mesayutsü saka tangari asen dak tajung alibaji reprangtetsü. Aji oda, asenok taküm aser kibong nung tesangwa alibaji asen meketa alirtemia angutsüsa asenok Tsüngrem den teti alitsübaji kanga tongtibang asütsü. Ken agia ashir, talang nung alirtemia nü dak aliba tesangwaji angutsüsa, na alidak sangwajang. Asenok ya tesangwa, anungji taküm piyong asenok asoshi amang ya tsükchir asütsü.

## OLEMSABANG

### Esau-i pei tambu senmang chi-auso ka yong ayok

~ L. Kika Pongener.

(Yashai adok nungi...)

Anungji pa-a parnok den tsüngsangnuba agi tetsü kolak tangzüka bener oa nia tsüngsangdi ta ashidang...Par medemeri Waaa...!!! Nabo netsü kolak chichiba bener aru...!!! Onok-bo asang-kolak ako...ta sayu. Tangar-bo pei 'Tetsü-kolak'-a ta asang-kolak ammer tsüngsanger, saka pabo chichiba tetsü kolak tangzüka bener ao. Iba matu-malem-sang denji kecha tepila mali, tanü asen Aotsür Aor yimsusur/lennir karbo tangar kechi sentong atonger'ar memetet, tangar jakla mangu, tapi-tapi agi tangar sulen anidakba yimsusur/lennir karbo lir. Ano yimsusur/lennir karbo tangar kechi Politics asayar'ar memeteti tangar asüm (Drum) atemdak tsüngsangba (Puppets) karbo lir. Tanü Aotsür Aor yimsusur/lennir karbo tangar nem atsüshia anishidaksüba (Remote control) karbo lir, ano tangar sulen hau-hau ta tekong angumdena anidakba (Yes-men) karbo lir, ano tangari kechi ajur/renemer agütsür aji dang jembiba (Mouth-piece) karbo lir aser nutsüng-nuburtema senyong pei temeden yoka achir aika lir.

Aotsür Aor senso tajungtem, tanü asen Ao kin kechi jenjang nung nokdaka lir...??? Nagaland State angudang Ao kin tanir/lennir sur tenzüka aruba, aser anaben-asemben tashi tekolak sur anir aruba, tanübo tekolak (Chief Minister) menden atatsübo oda yutsür, Kilonser tazünpur (Cabinet Minister) nunga number ka-ana-ase-bo matatsüsa jenjang ka küma-adok noo...??? Indian Parliament nung 'Tatar' (Member of Parliament) amentsü kata meshimtsüsa jenjang ka küma-adok noo...??? Naga nung rongnung Samanir kin-to tanübo tangar yangkü iloker, tangar sulen anidaktsüsa jenjang ka küma-adok noo...!!! Tangar sulen hai-hai ta tekong angumdena anidaktsüpur dang aküm noo...!!! Aotsür Aor senso tajungtem...Khen arok-aroka shisadangdi arung...Tangari anemsu agi konang-naroküm agüja, kibur kümja, sanga jembiba agi akoseta pelaseter...Asenoki kechiba Esau ama asen tambu senmang sen-yong ayoktsü...??? Tesulen aseni kanga sasa-a bilemstsü...Saka kanga menuatoker alitsü..."Waro orr tembang akoshiba" dang asütsü. Aotsür Aor senso tajungtem...Asenok khen longjemshitsü mapang kati menepogo.

Israel-pur Ijip lima nung küm noklang pezü tema alar tia nung aliba...Par tebou Abraham, Isak aser Yakob dang Tsüngremi nangzükbä aji mamai...Alar tia nungi aniteter, tanaben Kannan limai anir arua lidaksü. Ajisuaka, parnoki aji amaa-doker, Ijip lima nung külemba sungyanglutem dangi meyipa aoba ama...Tanü Ao kin Tsüngremi Naga nung tangar kintem dang nungi temaba jemjang nung ajungket sernung, iba tambu senmangji asen sasa sen-yong yoka achiba agi...Tanü asenok iba tia nung lidagi. Arung asenoki Tsüngrem bushia temulong meyipdi, aji oda, sura ashiko, Tsüngremi asenok dang tai atoktsü aser alemli ama asenok ajungkettsü sudi. Anungji Aotsür Aor senso tajungtem...Asenoki tang aruya-a aliba Election nungs ochishia asen vote agütsüdi aser yimsusur tajung shimdi.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger agateta agitsü mepishir**



# Nicaragua nung pastor 11 kum 15 tashi tepuokdak ayutsü



Nicaragua nung Protestant pastor tem noksa nung angur.

**April 06, 2024:** Nicaragua nung ketdangsertemi Evangelical telok ka den inyakba Protestant pastor 11 kum 12 nungi kum 15 tashi tepuokdak ayutsü obendang agütsüba den külemi pastor shia dang dollar sen senchi million 80 chiogo.

Pastor tem jagi senotsü tsütsü ochimashi inyakogo ta sorkari tai tongloksü, ajisüaka sorkari pastor tem anema kuli magütsüteter.

Iba linük nung sorkari Evangelical telok ya samatsütsü meranger, ta Mountain Gateway Order ministry nung tongti, Britt Hancock-i metetdaksü.

2015 kum iba ministry-i Nicaragua nung Puerta de la Montaña tenzükja liasü.

Interview ka nung jembidang Hancock-i, "Nicaragua nung register süa aliba ministry indang registration agienogo aser onok meyong kiojen ajak puogo. Parnoki onok indang bank accounts-a anentsüogo. Nicaragua nung Mountain Gateway organization anenadokogo," ta metetdaksü.

"Ajisüaka Tsüngrem yimli atema inyakba mapabo metembanger, aser tanela mapa maneni inyaksü. Ajisüaka joko iba linük nungji onoki organization ka amabo meinyaktetsü," ta pai ashi.

Iba linük nung evangelistic sentong 8 agia nisung million 1 shi item sentong nung adenba sülen nungi sorkari Mountain Gateway anema inyak tenzük.

Pastor 11 anema obendang agütsüba dak alia missionary asem- Hancock den pa kinüngtsü aser jabaso nung anema-a Interpol kübok 'red notice' agütsüogo, anungji parnoki Mexico nung tetsüng ajemokra parnok aputsüa akok.

Latin American linüktemia par asem aputsü aser parnok pura parnok asemprongla Nicaragua-i yoktsü, ta sangdongogo.

"Onoki Latin America-i mouteter, onoki Mexico-i mouteter, aser ibaji onok atema timtem tulu lir, kechiyong Mexico nung ministry amenoka lir," ta Hancock-i metetdaksü.

Mountain Gateway Order atema ken o jembitsür aser ADF International nungi legal counsel, Kristina Hjelkrem-i, "Nicaragua nung yimsü tsütsülen reshikangshiba nungi nisung shinga jembua mali. Tilateri nung ken otem benoker aser pei sensotem den Khristan yimsü lemsatepba atema item pastor tem aitsür," ta metetdaksü.

Osangbener den jembidang Hjelkrem-i, ADF International-i Inter-American Commission on Human Rights aser meimchir temeden atema inyaktertem dang Nicaragua nung pastor tem apuba ken o nung yaridaksüner ta mepishiogo, ta metetdaksü.

America nung asem- John Britton Hancock, Jacob Britton Hancock aser Casandra Mae Hancock nungeri US nungi aruba senotsü agizüksü atema Nicaragua nung Mountain

Gateway Ministry kongsang lapok, ta parnok-a aija liasü.

January ita nung osangbener den jembidang Mountain Gateway otongdar Steve Lisby-i, "Tai tongloksüba ken otem tamendakdakji shidak masü. Senotsü amshiba dak sendakba inyakyim shidak onoki benshiogo. Onoki Nicaragua nung meimba agi iba linüki aru aser onoki parnok den Yisu indang lemsatepner," ta metetdaksü.

"ADF International-i iba ken o nung Mountain Gateway pusemer aser tiyazü nung aija alirtem tenüng nung Inter-American Commission on Human Rights matsüngdang ken o benokogo," ta ADF International-i sangdong ka ajanga metetdaksü.

Nicaragua nung Tir, Daniel Ortega-i aniba sorkari, 2018 kum nürburtemi longkak aitba aser Tir menden nungi pa atsüngdoktsü merangba nung Khristan putirtemi shilem agiogo, ta tai tonglokja linük nung Arogo anema inyaker.

2018 kum nürburtemi Ortega Tir menden nungi anentsü takhangba agüja longkak aitba sülen nungi sorkari parnok anemaola adokertem aser Arogo lenirtem anema inyak tenzükja liasü.

Nicaragua nung Ortega-i aniba Sandinista National Liberation Front sorkari Mother Teresa's charity densema melungtet telok 3,000 dak tema anentsüogo.

# ANO GO ABEN TSÜNGREM DEN


## TAKOKER TAKÜM

Iba ozüng kaket ya ne bang nungi mepilatsü, saka idakji zülua aliba ajak timi benschitetsüsa nai ammag sangwa aben aji shisadangtsü; aji agi nai ne taküm lenmag azükarutsü aser nai takok tajung angutsü. Yihusua 1:8

Tatalokba otsü rongnung Israel nungertem Egypt nung ker kübok alar tia nung kum 430 lia arur Tsüngremi par tsürabur Abraham, Isak aser Yakob dang nangzükba Kanan lima bushia, lenir Mosa aser Yihusua nungeri tensa tia balala ajanga anir ao. Parnok takok ngua alizüng kum lir jajar külen atong, iba mapang ayong-ayonga aoba masü saka Tsüngrem telatet ozüng kübok khuret aser timtem aika arema jajayonga aoba Lai O nung shia angur. Tsüngrem Ozüng mebenshiba mapang temerenshi balala parnoki ajuruba kuli tejangja aika Lai O nung shia lir.

Tsüngrem dak amanger asoshi Pa tesayuba ozüngtem benshiba nung takok aser temoatsü aika lir saka Pa ozüng nungi pila-a pei sünütsü süa lira/inyakra pei mapa yari temerenshi agi atadar ta angatetdi. T. Ken 51 nung Chuba Dawidi pei taküm meyipba reprangdanga pei menen asoshi tai tatok meshia takoker taküm ka aküm. Tsüngremi melaba ozüngtem mebenshi tashi pai hau masütsü. Pei menen jagi meyiper pei taküm arishitsü, idangjibo takoksa tulu asütsü. Asenok ya tapi agi amanger masü saka Tsüngrem ozüng benshia alizüng ka yur takoker taküm ka akümtsü asoshi timtem aser khuret ajak kokteta Kotak nukla yurt teimla nung masü tashi tejaklen repranga jajadi.

# London nung Khristan kaket tejen ka auction asütsü



**April 06, 2024:** London nung akhidang züluba Khristan kaket ka auction asütsü; akhidang Christian liturgical kaketem rongnung ka, ta züngshiba 'Crosby-Schøyen Codex' ji pound sen million 2 agibosa yoktetsü, ta bilemer.

250-350 A.D mapang nung Egypt nungeri tzütök agi yangluba shidi 'papyrus' nung züluba kaketji akhidang nungi aliba Khristan monasteries nung liasü.

Osangbener den jembidang Medieval & Renaissance Manuscripts at Christie nung senior specialists, Eugenio Donadoni-i, "Iba mapangji 'papyrus' kaket melena codex form amshitsü tenzükba mapang ka liasü. Iba kaket nung akhidang züluba Laishiba nungi kaket ana lir," ta metetdaksü.

Auction asütsü aliba kaket tou 52 (tapak 104) ji kum 40 dak tema mapang agia züluba liasü aser kaket nungji Yona nungi Lai tekongtem, 2 Maccabees 5:27 - 7:41, 1 Peter, Melito of Sardis'

Peri Pascha 47 - 105 aser tekongtem densema lir, ta Easter anepdang atema renemba onük ka nung metetdaksü.

Donadoni-i, Egypt nung teshikong tsüngsang-mopung liaka item ajakji tizüka iba kaket wazüka yutetogo; Aso 3buba aser 4buba mapang nung züluba kaket aika rongnung kaket kar dang tanü tashi wazüka yuteta lir, ta metetdaksü.

"Aso 20buba aser Aso 19buba tatemanglen tashi nung ngutetba Khristan kaket tejentem ajakji Egypt nungi ngutetba liasü," ta pai metetdaksü.

'Crosby-Schøyen Codex' kaketji 1950s mapang nung ngutetba sülen 1981 kum tashi University of Mississippi nung yua liasü; iba sülen akhi kaket bendener nungtugu, Dr Martin Schøyen-i iba kaketji alizük.

Tang iba kaketji April 2 nungi April 9 tashi nürburtem dang sayatsü atema Christie's New York nung yua lir aser June 11 nü London nung auction asütsü.



Dimapur Area Ao Baptist Arogo Tenzukla Telongjem (DAABATT) senden ka Ao Baptist Arogo Padumpukhuri nung April 05, 2024 anogo nung adenshia sentong tajung ka agiogo. Iba sentong nung Arogo 31 nungi delegates 348 dena temoatsü ngua liasü. Iba senden omen "Shisa taka tetsur shiai Pei ki yanger" (A.shin 14:1) nung ajemdaker shisadokten mapang agia liasü. Iba sentong nung Wt.Yashila, APW. Aoyimti Baptist Arogo nungi tajungshi o jembi aser Padumpukhuri Ao Baptist Arogo nung Miss Alemla APW-i anir Women Ministry nungdakba mapa ajak achayangba asoshi pelaba lemsatepa liasü . Iba sentong nung adenertem külemi agiba noksa ka yangi angur .



**AO OSHI ANGAZÜKDAK:  
TANÜ ANGAZÜKTSÜBA OJANG**



**Sükshi**

(adv) züngok, züngsem (counted)

\* Lanurtemi parnok rongnung nia dena lir ta sükshi.

**Sükisülem**

(v) metetsümonga o belepteba jembiba (hypocritical)

\* Asüküm nisungi sükisülem o kanga jembir.

**OLONG PAITEP # 6749**

Grid for crossword puzzle #6749 with numbers 1-15 indicating starting positions.

Word list for puzzle #6749 with clues in Indonesian and word lengths.

**OLONG PAITEP # 6748 TELANGZÜBA**

Word list for puzzle #6748 with clues in Indonesian and word lengths.

**NAI-A YA METETTER MA  
ALIMA NUNG TAMBUSANG**



Alima nung tang taküm alir rongnung tambusangji arishi küm 111 tain John Tinniswood lir. British nunger John Tinniswood ya mapa nungi anisüngzükör küm 50 tema arur aser Venezuela nunger Juan Vicente Perez Mora (114) asüba sülen pai Guinness World Records title nguogo. Tinniswood ya 1912 küm Merseyside, England nung aso aser pa ya retired accountant aser taoba postal service worker ka lir. Pa ya tang küm 111 ser anogo 222 lir. Alima nung tambusang ta asüba kuli ya Guinness World Records experts aser Gerontology Research Group ajanga asadangba sülen John Tinniswood nem agütsüogo.

**Congress-i Manipur tensa tajungba kümdaktsütsü nangzükör**

Imphal, April 6, 2024

(Agencies): Congress president Mallikarjun Kharge-i Hokolbarnü New Delhi nung sayaba Congress manifesto nung Manipur sorkar atsüngdoktsü nangzükör lir.

Chief Minister N Biren Singh lenisüba kübok BJP-i aniba sorkar atsüngdoktsü aser kin balala tsüngda tangatetep kati arutsü atema Congress-i nangzükögo.

Lok Sabha elections 2024 asoshi Congress manifesto nungsa Reconciliation Commission jka tentettsü nangzükör lir. Iba commission ajanga Manipur nung alir ajak temulung asütsüsa political & administrative settlement ka agütsü ta parnoki ashir.

Congress manifesto nung Meitei aser Kuki nunger tsüngda mepetmesü adokba ajanga nisung 222 taküm samaba aser nisung 61,000 pei talidak toktsür aotsüsa akümiba tensa indang shia lir.

2013-14 nung preliminary agreement nung ajemdaker Naga teloktem den final solution aser agreement ka agütsü Congress-isa nangzükögo.

Onoki Border Trade pusemetsü aser shishilembabaren tuluba kümdaktsütsü. Indo-Myanmar arrtsü anasa Manipur kübok Moreh nung shishilembabaren ajungkettsü ta Congress manifesto nungsa shia lir.

Congress-i North Eastern state tem nung Autonomous

District Councils (ADCs) asentenshia tenzüktsü aser local government nung tongti shilem ka kümdaktsütsü nangzükögo.

Congress-i terenlok maparen atema senotsü ADCs ajanga yoktsü nangzükögo. Manipur nung tesüiba küm pezü tashi ADC elections magii arur.

Congress-isa süngolu nung mapa inyakerkem nem sen dalang aser tanga tajangzüktem agütsütsü nangzükögo.

Hokolbarnü Congress president Mallikarjun Kharge-i manifesto sayadang Congress Parliamentary Chairperson Sonia Gandhi, taoba Congress president Rahul Gandhi, KC Venugopal aser P. Chidambaram nunger liasü.

**AAP lennir Atishi Marlena-i Dibrugarh nung nübo yimtsütsü**

Guwahati, April 6, 2024

(Agencies): Aam Aadmi Party (AAP) lennir aser Delhi Education Minister Atishi Marlena-i anogo ana atema Dibrugarh semdangtsü.

April 8 aser 9 anogotem Atishi-i Assam semdangdang AAP atema nüboyimtsütsü.

April 8 nü Atishi Marlena-i Duliajan nung roadshow ka agia campaign tenzüktsü aser idangji Northeast atema AAP agenda metetdaksütsü.

April 9 nü Atishi-i Sonitpur semdangtsü aser idakji AAP candidate Rishiraj Kaundinya atema nübo yimtsütsü.

Sonitpur indang campaign

nung AAP alizüng aser policy tem metetdaksütsü.

Atishi-isa Tezpur nung party sentong ka nung adentsü aser iba ajanga Assam nung AAP tali shisanga akümstü imlar. La Assam-i aruba ajanga party züngsemtem aser pusemertem ajungmesotsü teimla lir.

**APS ketdangsür Raj Mohan Ray mapa nungi anentsüogo**

Guwahati, April 6, 2024

(Agencies): Darrang, Assam nung Superintendent of Police ama inyakdang APS officer Raj Mohan Ray-i tim masüba inyakba atema pa mapa nungi anentsüogo.

Assam Director General of Police (DGP) GP Singh-i Raj Mohan Ray mapa nungi anentsüba osang metetdaksü.

2022 küm ki mapa nung yariteptsü atema ayuba kilir tanur ka dak tashiyim agi shi nung medemba aser tepsetba ken o dak sendakba nung pa mapa nungi anentsü.

Assam nung police-i tim masüba inyakba atema "zero-tolerance policy" kübok April 1,

2024 nungi Raj Mohan Ray mapa nungi anentsüogo. Ray-i tarutsü nung sorkar mapa kecha meinyaketsü.

2022 küm Dhula nung arishi küm 13 tain tanur ka dak lar kiburi tashiyim agi shi nung medemba sülen tepset.

Iba nisung ya SSB personnel Krishna Kamal Baruah liasü aser mezüngbo tanutsüla la sasa soseta asü ta osang prokshi saka state sorkari bushisüngdang asütsü tetuyuba agütsü.

Assam CID-i bushisüngdanga arudang iba tatalokba miimbangtsü merangba bushitet. Ray dena police ketdangsür 3, executive

magistrate ka aser Mangaldai Civil Hospital nung doctor aseme bushisüngdangba maparen mashileni aniba aser Baruah kümzüka ayuba putet.

Mezüngbo Ray, Rupam Phukan (Additional SP) aser Sub-Inspector Utpal Bora nunger mapa nungi anenja liasü.

Iba sülen Ray aser magistrate Ashirbad Hazarika na jenshiyonga aru aser tesülen tena sasa temai adoka bendanga agütsü.

Mangaldai Civil Hospital nung doctor tem jagi taila post-mortem report ka agütsü. Iba ken o bushisüngdanga aruba sülen APS ketdangsür Ray teti atema mapa nungi anentsüogo.



Manipur nunger Indian Army Major M Pritam Singh den asüpila sentong agidang tangokba noksa ka angur. Pa ya Karakoram range nung Siachen Sector nung mapa lemzüka liasü aser April 3, 2024 nü asü. Major M Pritam Singh indang mang April 5 nü Imphal Airport tonga bener aru aser idak nung jagi Luker, Imphal West district nung par kidangi bener ao. Major M Pritam-i Army Cadet College aser Indian Military Academy, Dehradun nung azüngba sülen December 9, 2017 nü Indian Army nung anioka liasü. Pa Siachen Sector nung mapa lemzüka inyakdang temang mejungi kümer alima nungi pila.



# Mexico-i Ecuador den diplomatic tesendaktep mauytsü telemtetba agi



Jorge Glas

**Mexico City, Rongchii/April 6 (Agencies):** Quito nung Mexico indang embassy tashiyim agi rakpoka ia Ecuador indang vice president Jorge Glas shiba iba embassy nung jenoka liasü, pa apuba sülen Mexico-i Ecuador den diplomatic tesendaktep mayutsü telemtetba agiogo.

Glas, shibai ochi mashi inyakyim atema anaben tashi aitsüogo, pa December ita nungi Mexico indang embassy nung jenoka liasü.

Mexico indang Ministry of Foreign Affairs-i Hokolbarnü ashiba agi, parnok i yimden yimsüsü dak ajemdaker Glas parnok indang embassy nung jenokdaksüogo aser pa linük toktsür aotsü atema temelaba agütsütsü ayongzükogo.

Ajisüaka bulletproof vests aser helmets densema tactical gear tem semer Ecuador indang special forces-i Hokolbar aonung tashiyim agi embassy telungi ai aser Glas pua liasü.

"Ecuador ya sovereign linük ka lir aser onoki ozüing alema i n y a k s a n g s h i r t e m sademsadema melidaksütsü,"

ta embassy mamak tsüingda Ecuador Tir-i sangdong ka ajanga metetdaksü.

Mexico Tir Andres Manuel Lopez Obrador-i X ajanga, embassy-i nongpoka ia Glas apuba ya tashiyim amshiba inyakyim ka aser international temzüing ozüing aser Mexico indang sovereignty anema inyaksangshiba lir, ta ashi.

Ecuador nungner aika atema aija aliba taoba vice president nem Mexico-i tejenokdak agütsüba ya temzüing ozüing mezüingmeshiba ka lir, aser talisa pa ya Mexico Tir den kanga junga sendaktepa aliba nisung ka lir, ta obendanger aser political commentator Adrian Perez Salazar-i ashi.

"Ajisüaka iba timtem liaka embassy tashiyim agi rakpoka aiba ya international temzüing ozüing ajanga temeden magütsür," ta Salazar-i Guayaquil, Ecuador nungi Al Jazeera dang ashi.

Mexico indang foreign minister Alicia Barcena-i X ajanga ashiba agi, iba tatalokba nung diplomat tem aika yiruogo, koba lai ashiba agi, diplomatic tesendaktep dak sendakba nung Vienna Convention anema inyaksangshiba ka lir.

Mexico nungner diplomatic personnel tem tangsa tang Ecuador toktsür aotsü ta ashiba den International temzüing ozüing nung aibelenba atema Ecuador aitsütsü asoshi Mexico-i International Court of Justice (ICJ) nem temepeshiba ka agütsütsü, ta shisem.

"Embassy tem dak mekongshitsüla ta International temzüing ozüing nung jangja

jangja shia lir aser Ecuador sorkari kechi kuli bener arudir aruaka iba ken o nung parnok temeden mangutsü," ta Salazar-i Al Jazeera dang ashi.

Mexico Tir-i Ecuador nung election indang jembiba sülen anogo ka lir iba ya ataloka liasü. Mexico Tir-i iba olen lemsatepba ya kanga tia maka ta Ecuador-i shia liasü.

Lopez Obrador-i, taoba küm Ecuador indang Tir candidate Fernando Villavicencio tepsetba indang jembiba aser iba tatalokba ya Mexico nung tang election agütsü aliba mapang local candidate tem aika khasetba den medemdanga jembiba liasü.

Paisa, Villavicencio tepsetba aser media-i osang balala prokshiba ajanga Luisa Gonzalez tamakok ngua liasü ta ashi.

Lopez Obrador-isa, media outlets tem dak rangloker jembiba aser ashiba agi, election atema nüboyimba mapang tensa mejungi akümba ya item media outlets tem ajanga lir.

Iba sülen Ecuador sorkari Mexico ambassador Raquel Serur Smeke ya joko Ecuador-i magizüker ta shia la dang takaratiba nung linük toktsür aotsü atema tetuyuba agüja liasü.

Ecuador nung taküm küm tetenzük nungi azütokshi lendong atalok arudar. Iba linük nung tepuokdak balala nung mepetmesü adoka ozüing alema inyaksangshiba telok nungi lenirtem jena ao aser ozüing alema inyaksangshirtemi live television broadcast ka maka idakji inyakeritem sota yua liasü.

## MOLUNGNEN O



LT. IMNANUKSHI LONGCHAR  
13-08-1989 - 28-03-2024

Onoki teti meima aliba Lt. Imnanukshi Longchar ajungbena iba akümüli toktsür aoba mapang kija, kibong, Arogo, yimten aser temeimertem kwikati ozü asükho nung sarasadem, nübu aser rongsen agi yaritepogo, nenok ajak dang pelaba lemsateper.

Nenok temeim aser mapa tajung onoki kodanga mamatsü. Teyanglur Tsüngremi nenok tali moajangma.

-Temeim kinüngtsü, chirnurtem aser kinüngertem

## DIMAPUR AREA AOR ORDAINED MINISTER FELLOWSHIP

### RONGCHII 5, 2024 DABA NUNG MENSEM ALIDANG LEMTETBA

18th Lok Sabha Election: India nung Political Party rongnung kobaisa Constitution, akangakanga ameter Khristantemi parnok yaritsü mapang tongogo. India nung telok ishiba (minority community) koda mesüi aliba mapang ka nung Secular Govt. ka adoka India nungner ajak pelatepa litettsü atema ayongzükker.

DABA nung DAAOMF kenü lumia sarasademtsü, aser Dimapur yimti nung tesem kar nung Lok Sabha Election nung Clean Election tangatetba nung ajaki shilem agütsü tayongzükba agüja sarasadema senzütsü. Ibai Rongchii 9, 2024 (Sangtennü) anepdang 6 - 10 bajji tashi sarasademtsü iba sülen tesem kar nung sarasadem sentongji agütsü lemtet.

Nagaland Liquor Prohibition Act 1989, takok ngua meinyaktetba atema DAAOMF-i ABAM aser NBCC ajanga iba ya mapa küma inyaksü anonger.

Nagaland For Christ 1959 takok ngua inyaktettsü Tsüngremi Naga arogotem nem khuret agüjang ta onoki sarasademer.

LGBTQ+ ya tanü putu atema tebilemtsü khuret ka kumogo. Tsüngremi tebur tetsür masüba shinga meyanglu. Anungji LGBTQ+ aser same sex marriageji temenen. Arogoi aji magizüktsü, saka Laishiba tesayuba nung aibelen mesüi tekümtet lenmang parnok dang sayutsüla.

Sd/-  
Rev. Dr. L. Kari Longchar  
Convener

Sd/-  
Rev. C. Walu Walling  
Secretary

# Ukraine rara: Kharkiv nung nisung trok tepset



Russia-i missile amshia Ukraine amakba sülen fuel system ka raksar aliba noksa nung angur.

**Kyiv, Rongchii/April 6 (Agencies):** Russia-i drone amshia Ukraine kübok Kharkiv yimti amakba sülen nisung trok tepsetogo, ta local ketdangsürtemi metetdaksü.

Mayor Ihor Terekhov-i ashiba agi, Iran nung yangluba Shahed drone temi Honibar anepdang apartment block tem

densema nisung aliba ki aika maka liasü.

Kharkiv ya Russia den arrtsü nung aliba yimtitem rongnung anasatiba lir aser hopta ishika tsüingda iba yimti ya aiben maka arudars.

Ukraine nungner ketdangsürtemi, tarutsü nung Russia-i iba yimti atsüngtsü

atema amaktsü akok ta shiogo.

"Kharkiv yimti nung yimjung nung aliba nüburtem amakba ajanga Russia ya kiralongrar state ka ta maneni kuli agütsüogo," ta Terekhov-i Telegram messaging app nung zültsü.

Shevchenkivskyi district amakba sülen ano nisung 11

tashi yiruogo, ta local prosecutor indang office sangdong ka ajanga metetdaksü.

Kasa sangdong ajangsa, aiben atongtepa tua aliba ki, administrative building, dormitory tem, kindergarten ka, dokan, café aser garitem raksatsüogo.

Local police-i ashiba agi, Moscow-i missile ana khaloktsü aser iba sülen injang aika khalokja liasü. Maneni tekümzükba maparen inyaka aliba mapang drone amshia iba tesem maka liasü.

Local police force nungi Volodymyr Tymoshko-i social media ajanga ashiba agi, "missile agi kongshir aliba tesemtem nung ken o dak sendaka aliba service tem ajak inyaka aliba mapang tsükchir indang drone tonga aru."

2022 küm February ita nungi Tir Vladimir Putin-i Ukraine amak tenzükba sülen Kharkiv yimti ya aiben maka arudar aser iba ajanga

teraksatsüba tulu ajangshia arudar.

Poland nungner ketdangsürtemi ashiba agi, tawa missile amshia Ukraine amakba sülen fighter jets tem renema liasü.

Kyiv nung ketdangsürtemi ashiba agi, linük yimtiba amakba nokdangtsü atema air defences inyaksangshi tenzükogo.

Ukraine indang military-i ashiba agi, parnok indang air defence-i Russia-i yokba drone 32 nungi 28 aser missile trok nungi asembo raksatsüogo.

Brehostibarnü Russia-i drone tem amshia Kharkiv amak aser iba mapang nisung pezü tepseta liasü, ta Ukraine nungner ketdansürtemi metetdaksü.

Kasa mapang nung Hokolbarnüa Russia-i missile amshia Zaporizhzhia yimti amakba sülen nisung pezü tepset aser nisung 20 dak tema yiruogo, ta ketdangsürtemi metetdaksü.



## Anupama & Tharun nati Kazakhstan International Challenge kokogo



Anupama & Tharun

**Rongchii/April 6, 2024 (Agencies):** India nung badminton asayar Anupama Upadhyaya aser Tharun Manneppalli nati Honibarnü Uralsk nung Kazakhstan International Challenge asayamung tebur aser tetsür kija asaya kokogo.

Almora nungi arishi kum 19 tain Anupama, shiba taoba ita Polish International challenge kokogo, lai final asaya nung külem India tsür Isharani Baruah 21-15 21-16 agi koka asayamung anabuba atonga kokogo.

Kasa mapang nung arishi kum 22 tain Tharun, shiba taoba kum Guwahati nung December ita senior national championships asayaba mapang runner-up liasü, pai final asaya nung Malaysia

nung asayar Soong Joo Ven 21-10, 21-19 agi koka tang mezüngbuba international title ka benogo.

Kasa asayamung tarep temeyoktep asaya nung India nung tarep Sanjai Srivatsa Dhanraj aser Maneesha K nati Malaysia nung tarep Wong Tien Ci aser Lim Chiew Sien na 21-9, 7-21, 12-21 agi mekoki tanabuba jenjang nung tembanga liasü.


Anupama ya taoba mapang senior national champion lir aser lai hopta tepeyong kanga junga asaya aruogo aser iba asayamung nung külem India tsür Harshitaa Rout, Czech Republic tsür fifth seed asayar Tereza Svabikova, India tsürsa

Devika Sihag aser Japan tsür Sorano Yoshikawa akokba sülen final tongteta liasü.

Anupama, shiba taoba mapang junior world No. 1 asayar liasü, lai 2021 kum India International Challenge akok, 2022 aser 2024 kum Polish Open aser 2023 kum Tajikistan International Series koka lir.

Kasa mapang nung Tharun-ia iba asayamung nung külem India nung asayar Gagan Balyan, 2022 World Junior Championships silver medallist S Sankar Muthusamy, Kazakhstan nunger fourth-seeded asayar Dmitriy Panarin aser seventh seed Vietnam nung asayar Le Duc Phat koker final tongteta liasü.

## UAE-i Usman Khan nem kum 5 atema tenokdangba agütsü



Usman Khan

**Dubai, Rongchii/April 6 (Agencies):** Emirates Cricket Board-i Hokolbarnü Pakistan nung asoba cricket asayar Usman Khan nem kum pongu atema tenokdangba agütsü. Usman-i pa asoba linük tenüng nungi asayatsü atema tejangraba sayuba sülen iba jenjang ya agiogo.

Pakistan Super League nung asayaba mapang century ana atonga azükba sülen Khan ya Pakistan den training agidar aser pa asayaba yimya agi asayar shimertem atsüa aruogo.

Arishi kum 28 tain Khan ya PSL nung bendanger asayar ka ama final tonga asayaba Multan Sultans team nungi asayaogo, aser tang pa Pakistan tenüng nungi asayatsü janngar ama angateter.

"Ken o kanga junga bushisüngdangba sülen Usman-i, ECB dang pa UAE team nungi asayatsü atema telemtetba agiba indang osang tai agütsü aser tanga nukjidong ataloktsü atema ECB-i agütsüba maongkatem agiba ngutetogo," ta ECB-i ashi.

ECB-isa, Khan-i ECB nem tagütsü tim kechi ali aji magütsü aibelenogo, anunggi pa ECB-i ayongzükba tournaments/leagues aser councils/academies kübok ayongzükba local asayamungtem nung kum pongu atema shilem magidaksütsü telemtetba agiogo, ta metetdaksü.

Kum pongu atema tenokdangba agütsüba tetezü Khan, United Arab Emirates nung ayongzükba asayaba tongtibang league ana: ILT20 aser Abu Dhabi T10 nung 2029 kum tashi masayatetsü.

ECB-i ashiba agi, Khan takum ILT20 nung local asayar ka ama shilem agiogo aser pa den kum ka atema tenangzüktepba yanglur liasü.

"Pa nem security agütsütsü aser pa international cricket nung UAE tenüng nungi asayatsü atema temsüa kümdaksütsü asoshi iba jenjang agia liasü," ta ECB-i ashi.

Pakistan team June ita Caribbean aser United States nung T20 World Cup masaya tsüngda T20 asaya 11 asyatsü lir. Pakistan team New Zealand den iba ita tatemlen kidang T20 asaya pongu asayatsü atema renemdar aser iba atema Khan shimtsü imlar.

## Jofra Archer 2024 kum Test cricket masayatsü

**Rongchii/April 6, 2024 (Agencies):** England nung nungtugu cricket asayar Jofra Archer, tekatsüla yiruba anepalua aliba mapang ka nung takum kum tepeyong Test masayatsü saka June ita T20 World Cup asaya nungbo shilem agitsü atema rangloker inyakdar, ta England tebur team managing director Rob Key-i ashi.

Archer tekatsüla nung timtem aliba ajanga taoba kum May ita nungi masayai arudar aser pa temang anepaluba mapang pa asoba tesem Barbados-ia oa club cricket asaya nung shilem agitsü.

Key-isa, Archer India nung Sussex den pre-season training agiba mapang kanga junga asayaogo aser pa club asaya balala nung shilem agitsü atema aser taruba ita Pakistan den T20 asayatsü aliba atema renemshitsü atema Caribbean-i meyipaogo, ta ashi.

"Jofra pre-season atema Sussex nungi India nung oa

asayaogo aser pai ball kanga kara ona kanga junga asayaogo. Pa club cricket kar asayatsü atema Caribbean-i ogo aser takum T20 World Cup atema renemtsü asoshi rangloker inyakdar. Pa Pakistan den asayatetsü imlar saka tangbo kecha shia matatetsü," ta Key-i Sky Sports dang ashi.

Archer white-ball cricket asaya nung maneni shilem agitsü England team timla lir, ajisüaka pa Test cricket asaya nungbo kanga karabo shilem magidaksütsü.

"Pa mapang tatsüka atema dang masü saka talangka asayatetsü atema renemdaksütsü asoshi onoki jenjangtem meyilongi dang agidar. Jofra dak sendakba nung onok sentonggi pa takum lemluwa white-ball cricket asayadaksütsü asoshi lir aser taruba kum lemluwa India aser iba sülen Australia den Ashes asayaba mapang pa Test asaya nunga shilem agitetsü imla atar," ta Key-i ashi.

## Monte Carlo Masters: Nagal-i qualifiers nung Flavio kokogo



Sumit Nagal

**Rongchii/April 6, 2024 (Agencies):** India nung tennis asayar Sumit Nagal-i Honibarnü tang asaya aliba Monte Carlo Masters qualifiers nung world number 63 Italy nung asayar Flavio Cobolli straight sets nung kokogo.

World number 95 India nung unseeded asayar yagi iba asaya nung eighth-seeded asayar Cobolli 6-2 6-3 agi ayong ayonga koka liasü.

Nagal qualifier atema tatembangbuba round nung Argentina nung asayar Facundo Díaz Acosta mesüra Diego Schwartzman na den asayatsü.

Acosta ya world rankings nung 55buba aser iba asayamung nung third seeded asayar lir aser kasa mapang nung Schwartzman ya jenjang 124buba nung lir. Pa iba asayamung nung shilem agitsü atema wild card ngua liasü.

Qualifier asayaba sülen asayar tenet main round nung asayatsü atema maongka

angutsü.

January ita Australian Open main draw nung asayaba sülen Nagal-i kanga junga asaya arudar. Australia Open nung pai mezüngbuba round nung Kazakhstan nung asayar Alexander Bublik akok, ajisüaka tanabuba round nung tsüka liasü.

Pai takum Chennai Open kokogo aser iba sülen Challenger asayamung ana den ATP 500 competition (Dubai Championship) ka aser ATP 1000 Masters (Indian Wells aser Miami) ana nung asayaogo.

Chennai nung takok anguba sülen Nagal-i Bengaluru Challenger asayaba mapang dang semifinal tonga asaya liasü.

Kasa mapang nung world number one tarep Rohan Bopanna aser pa indang Australia nung partner Matthew Ebden (top seed) nata Monte Carlo Masters nung shilem agiba angutsü.

## BILEMDANGANG

"Sentong ka medeni nukjidong ayubaji amajok."